

Powšitkowne WOZJEWJENJA

njedźelu, 8. julija 2012

Swójbne popołdno na Kukowskim hrodźišću

Dekanatne dušepastyrstwo přeprašuje na swójbne popołdno tutu njedźelu, 8. julija, na Kukowske hrodźišće. Nyšpor zahaji so w 14.30 hodź., kotryž šole a džěci ze serbskich wosadow wobrubja. Přizamknu so swačina a wšelake poskitki. Džěci změja mjez druhim móžnosć, sej z hajnicu Christinu Handrikowej Božu stwórbu wotkrywać, hry hrać a so na wšelakore wašnje zaběrać. Za młodzinu a dorosćenych poskića so wšelake workshopy ze serbskimi duchownymi.

Putnicy do Krupki so zetkaja

Zhromadźizna putnikow do Krupki je tutu njedźelu, 8. julija, po nyšporje na Chróšćanskej farje. Štóz so přeni raz na putnikowanju wobdžěli, njesmě na nej na žadyn pad pobrachować. Boža mša w Krupce budže srjedu, 1. awgusta, w 10 hodź.

Koncert z njeznatymi serbskimi twórbami

We wobłuku Łužiskeho hudźbneho lěča zarjaduje město Budyšin wulki serbski koncert, kotryž budže njedźelu, 8. julija, w 19.30 hodź. w Němsko-Serbskim ludowym dźiwadle w Budyšinje. Sobu skutkować budu mjez druhim Daniela Hazec a Tanja Donatec kaž tež chóraj Serbskeho gymnazija a Serbskeho ludoweho ansambla, chór Budyšin a za tutón program zestajany projektowy muski chór. Cyłkowny wumělski nawod změje Friedemann Böhme.

Koparski turněr hólčich a holčich młodžinskich mustwow

Lětuši koparski turněr serbskeje dekanatneje młodžiny budže sobotu, 14. julija, w Pěskecach. Zakop je w 10 hodź. Hraje so ze šěsć pólnymi hrajerjemi a wrotarjom. Mustwa – hólče kaž tež holče – měli so hač do pónđzele, 9. julija, w běrowje dekanatneho dušepastyrstwa we Worklecach přizjewić, telefonowe čisło (03 57 96) 9 55 95.

Nowy wobrazowy zwjazk wo katolskich Serbach so předstaji

Knižna premjera k nowej knize „W katolskich Serbach – dokumentacija žiweje wěry we wobrazach“, spisana wot fararja Gerata Warnarja a z fotografijemi Maćija Bulanka budže wutoru, 17. julija, w 19 hodź. w Chróšćicach na farje. Němskorěčne wudaće tuteje knihi předstaji so srjedu, 18. julija, w 19 hodź. w Smochčanskim Domje biskopa Bena.

Hač křižerske procesiony, putnikowanja do Róžanta abo swjedzeń Božeho ćěla, znaty serbski fotograf Maćij Bulank je za nowy wobrazowy zwjazk najrjeńše motiwy w katolskich Serbach zapopadnył. Fota swědča wo žiwej wěrje, kotraž pokazuje so w hajenju naložkow a wašnjow w běhu lěta runje tak kaž wšědny džeń, hdyž chodža wěriwi z Wosadnikom w ruce kemši abo hladaja rowy svojich zemrětych přiwuznych. W tekstach zhladuje farar Gerat Warnar na swoju domiznu a swój lud. Wón zwěsći: „Mam tónle serbski kraj a jeho ludži rady. Tu sym doma. To je mi na zemi kus njebjes.“

Koncert w Kamjencu

Spěwar Gerald Schön, přewodžany wot Oksany Weingardt-Schön na piščelach, wuhotuje pónđzelu, 9. julija, w 19.30 hodź. (nic kaž dotal wozjewjene, w 19.00 hodź.) koncert w cyrkwi swjateje Hany w Kamjencu (při pósće). Zaklinča kěrluš Jana Kiliana kaž tež spěwy dalších serbskich komponistow. Zawod do žiwjenja a skutkowanja Jana Kiliana poda Trudla Malinkowa.

Zetkanje ministrantow, kotřiž pojedu do Zakopaneho

Wšitcy ministranća, kotřiž pojedu w awgusće na kubłanske dny do Zakopaneho, přeprašuje Towarstwo Cyrila a Metoda na zetkanje, kotrež budže sobotu, 14. julija, wot 9 do 12 hodž. w Chróscicach na farje. Wobdželenje wšitkich je jara wažne, dokelž zhonja tam wšitke nadrobnošće kołowokoło kubłanskich dnjow. Nimo toho sprosředkuja so zakłady w pólsčinje.

Lětni koncert w Radworju

Chór Meja přeprašuje wšitkich zajimcow na swój tradicionelny lětni koncert njedzelu, 15. julija, na zahrodze před Starej cyrkwičku w Radworju. Wot 15 hodž. poskići so swačina. Koncert zahaji so w 16 hodž. Program wuhotuja nimo Mejanow džěći Radworskeje pěstowarnje AWO a skupina bubnarjow, kotřiž předstaja afriske zynki. Sćěhuje překwapjenka za džěći.

Přizjewće so za swětowe zetkanje młodžiny 2013

W brazilskim měsće Rio de Janeiro wotměje so klětu w juliju swětowe zetkanje młodžiny. Serbscy młodostni móža so na nim w skupinje Drježdžansko-Mišnjanskeho biskopstwa wobdželić. Předwidžane je, zo wotleći tuta skupina klětu 14. julija z Němskeje. Přihotowanske dny w diecezach změja w Sao Paulo. Tam skutkuje Arnold Brack, měšnik z Drježdžansko-Mišnjanskeho biskopstwa. Potom wobdžěla so na zetkanju z wjace hač milionom młodostnych. Na zakónčace kemše wočakuja samo na štyri miliony młodostnych. Skupina wróći so klětu 30. julija do Němskeje. Wokomiknje kalkuluje so z 1.800 eurami na wobdžělnika, za dalšeho ze swójby 200 eurow mjenje. Wo spěchowanske srědky so zamołwići prócuja. Zajimcy mjez 18 a 30 lětami měli so pod www.kathjusa.de/wjt2013 najspěšnišo přizjewić. Ličba wobdžělnikow je na 50 wobmjezowana.